

Ukioq 2015 pinngitsaaliisarnernut akiuniarfittut ukiunnngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens B. Frederiksen, Demokraatit)

Akissuteqaat

(Ilaqutariinnermut Inatsinillu Atuutitsinnermut Naalakkersuisoq)

Siullermeerneqarnera

Jens B. Frederiksen qujaffigissavara soqutiginaatilimmik siunnersuuteqarneranut.

Naalakkersuisut isumaqarput, pinngitsaaliilluni atoqateqartarneq pinerlunnertut naliligassaaginnarani inoqatigisap kiffaanngissuseqarluni inuunissaanut sakkortuumik innimiilliornerusoq, taamaattumillu inuiaqatigiinnit isigalugu akuerineqarsinnaanngilluinnartoq. Taamaattumik taamatut pisartut akiorniarnerni unammilligassagut annertuujupput, tassami arnarpassuit pinngitsaaliisarnikkut atoqatigineqartarmata.

Soorlu Jens B. Frederiksen-ip allassimagaa kisitsisit saqqummiunneqartut qaffasippallaarujussuarput, ajoraluartumillu nassuerutigisariaqarparput innimiilliornerit ikiliartorpasinngitsut. Tamatuma ilaatigut kingunerivaa, arnarpassuit arlaatigut pisooqqataasutut misigisimanertik anniaatigisaraat kanngusunnertik imminnullu ajorisinnaasarnertik pissutigalugu unittoortutut pissuseqalersartut. Misigisammi taamatut ittut arnarpassuit namminneq pigiinnartarpaat. Taamaattumillu erseqqissaavigiuartariaqarparput arnat taamatut pineqarsimasut kisimiinngimmata, aammalu ikiortissarsiornissamut periarfissaqarmata.

Pissaaneq nukiillu atorlugit innimittaalliornerit inunnut pineqartunut inuiaqatigiinnullu tamaginnut aningaasarsiornikkut kingunipiloqartartorujussuusarput. Pinngitsaaliinnerup kingunerisaannik ilaatigut arnap ilinniakkaminik naamassinnissinnaanissaanut suliffimmillu paarsiinnarsinnaaneranut kingunipiloqartitsisinnaasarpoq. Inniminniilliornerit aamma kingunerisaanik isumaginninnikkut, peqqinnissakkut taamatullu eqqartuussisutigut soorunalimi aamma politiit pinerluttaalisitsiniartartullu sulinerannut sunniutipiloqartartorujussuupput.

Taamaattumik Naalakkersuisut ammaffigivaat taamatut ittumik siunnersuuteqartoqarsimaneranut. Tassami taamatut siunnersuuteqarnikkut anguniarneqarmat pitsaaliuinerup sukumiinerullunilu inniminniilliornerit pisartunik annikillisaaniarnissaq.

Inatsisartut 2013-mi ukiaanerani ataatsimiinnissaanut Naalakkersuisut pilersaarutigivaat pissaanermik atuiniartarnerup akiorniarneqarnissaanut pilersaarusiassaq, tamatumani aamma ilaassalluni atoqatigiinnikkut innimitsaatsuliortarnerit akiorneqarnissaat. Iliuuseqarnissamut siunnersuuteqarnissami ilaatigut isiginiarneqassapput innimitsaalliorfigineqarsimasut illersorneqarnissaat pisinnaatitaaffiilu. Tamatumali saniatigut iliuuseqaataasartut suli pitsaanerulersinneqarnissaanik ilaqassallutik, tamatumani inniminniilliorfigineqarsimasut ikiorserneqartarnissaanut tunngassuteqartut.

Ajornarsiutip ilaatigut matumani qaqinniakkama ilagivaat, arlaatigut ilaqarnissaq siunertaralugu pissusilersuutigineqartartut isiginiarneqarnerunissaat. Tamannami aamma pinngitsaaliinnertut isigineqarsinnaavoq, taamaattumillu pikkoriffiginerusariaqarlutigu pitsaaliortarnissaat aqutissiuunniutissagutsigu.

Maannangaaq Naalakkersuit suliniuteqarnerminni annertuunik angusaqareersimapput, tassami inniminniilliorfigineqarsimasut tarnikkut eqqorneqaatigisimasaat pillugit katsorsaassartussanik angalaqatigiittartussanik pilersitsisimagatta. Taakkua innuttaasunut atoqatigiinnikkut innimitsaaliiorfigineqarsimasunut kinguneqarnerluttitsisimasut ikiorserniartassavaat. Siunertaraarpummi angalaqatigiittartut arnat siusinnerusukku pinngitsaalineqarnikuusimasut anniaataat pillugit katsorsarneqartassasut.

Tamatuma saniatigut Naalakkersuisut sulissutigivaat ilaqutariinnut sullissiviit, qimarnguiit aammalu kommunini pisoqarsimatillugu sillimasussaatitat pitsaanerulersinneqarnissaat. 2013-p ingerlanerani pisariaqartitsinerit pillugit qulaajaanikuusimavugut aammalu pisoqarsimatillugu sillimasussaatitat nalilersuiffigeqqinneqarnissaat. Suliniutit tamakku immikkut isiginiarnerisigut neriuutigaarput iliuuseqaataasartut sakkortusaavigineqarsinnaajumaartut. Nalilersueqqinnerit aamma takutippaat, qimarnguiit ineriartortinneqarnissaat aammalu piffinni assigiinngitsuni amerlanerit pilersinneqartariaqartut. Naalakkersuisut qimarnguinnut tapiissutaasartut marloriaatinngortissimavaat aammalu kommunit oqaloqatiginerisigut aqutissiuunniarlugu qimarngueqartarnerit ineriartortitsiffigineqarnissaat.

Naalakkersuisunit Jens B. Frederiksen isumaqatigaarput, kinguaassiutitsigut kanngutsaatsuliornerit pillugit suliniutit ataatsimut isigalugu sulii annertusartariaqartut. Naalakkersuisunit kissaatigaarput pitsaaliuisarnernut katsorsaasarnernullu tunngatillugu suliniutaasartut piffissaq ungasinnerusoq isigalugu sukateriffigineqassasut. Kisianni aamma innuttaasunut paasititsiniaanerit, suliniutit assigisaallu ajunngitsumik angusaqarfiusinnaasarput.

2013-p 2014-illu ingerlanerani Naalakkersuisut nuna tamakkerlugu suliniutinik ingerlatsiniarput, persuttaasarneq akiorniarlugu siunertaqartunik, taassanilu ilaavoq kinguaassiutitsigut atornerluisarneq. Taamaattumik pissusissamisuussaaq kinguaassiutitigut atornerluisarneq suliniutinut taakkununga ilaatinneqassasoq.

Taamaattumik Naalakkersuisut piffissaq qaninnerusoq ungasinnerusorlu isigalugit siunnersuuteqartumit tikkuarneqarsimasunik assingusunik iliuuseqaatissanik pilersaaruteqareernertik tunngavigalugu, siunnersuut taamatut isikkoqartillugu immikkut ukioqartitsilluni iliuuseqaateqarnissamut siunnersuutip akuersissutigineqarnissaa oqariartuutigissavarput.